

食貨典第七十卷

荒政部彙考三

南齊

高帝建元元年九月辛丑詔二吳義興三郡遭水減今年田租 按南齊書高帝本紀云云

建元二年詔丹陽二吳義興四郡遭水尤劇之縣詳所除宥 按南齊書高帝本紀建元二年六月

癸未詔昔歲水旱曲赦丹陽二吳義興四郡遭水尤劇之縣元年以前三調未充虛列已畢官長局

吏應共償備外詳所除宥

建元四年武帝卽位詔賑京師 按南齊書武帝本紀四年三月壬戌上卽位庚辰詔曰比歲未稔

貧窮不少京師二岸多有其弊遣中書舍人優量賑卹五月癸未詔曰頃水雨頻降潮流薦滿二岸

居民多所淹漬遣中書舍人與兩縣官長優量賑卹六月戊戌詔曰水潦爲患星緯乖序京都囚繫

可剋日訊決諸遠獄委刺史以時察判建康秣陵二縣貧民加賑賜必令周悉吳興義興遭水縣蠲

除租調

武帝永明五年以水潦傷農遣使賑賜詳蠲租調又詔平糴和市以優黔首 按南齊書武帝本紀

永明五年六月辛酉詔曰比霖雨過度水潦洊溢京師居民多離其弊遣中書舍人二縣官長隨宜賑賜八月乙亥詔今夏雨水吳興義興二郡田農多傷詳蠲租調 按冊府元龜永明五年詔曰

善爲國者使民無乏而農益勸是以十一而稅周道克隆開建常平漢載惟穆岱畎絲枲浮汶來貢杞梓皮革必緣楚往自水德將謝喪亂弘多師旅歲興饑饉代有貧室盡於課調泉具傾於絕域軍國器用動資四表不因厥產咸用九賦雖有交貿之名而無潤私之實民咨塗炭實此之繇昔在開運星紀末周餘弊尙重農桑不殷於曩日粟帛輕賤於當年工商罕兼金之儲匹夫多饑寒之患良田園法久廢上弊稍寡所謂民失其資能無匱乎凡下貧之家可蠲三調二年京師及四方出錢億萬糴米穀絲綿之屬平和其價以優黔首遠邇邦常市雜物非土俗所產者皆悉停之必是歲賦攸宜都邑所乏可見直和市勿使逋刻

永明六年詔賑吳興義興被水者又詔出各處庫錢市積爲儲 按南齊書武帝本紀六年八月乙卯詔吳興義興水潦被水之鄉賜病疾篤癘口二斛老疾一斛小口五斗 按杜佑通典永明中

天下米穀布帛賤上欲立常平倉市積爲儲六年詔出上庫錢五十萬於京師市米買絲綿紋絹布揚州出錢千九百一十萬南徐州二百萬各於郡所市糴南荊河州二百萬市絲綿紋絹布米大麥江州五百萬市米胡麻荊州五百萬鄧州三百萬皆市絹綿布米大小豆大麥胡麻湘州二百萬市米布蠟司州二百五十萬西荊河州二百五十萬南兗州二百五十萬雍州五百萬市絹綿布米使臺傳並於所在市易

永明七年以雍州戎役水旱詔原逋租 按南齊書武帝本紀七年春正月戊申詔曰雍州頻歲戎役兼水旱爲弊原四年以前逋租

永明八年以歲不稔原司雍二州及汝南郡逋租又以京邑霖雨遣官賑恤 按南齊書武帝本紀八年秋七月癸亥詔司雍二州比歲不稔雍州八年以前司州七年以前逋租悉原汝南一郡復限更申五年八月丙寅詔京邑霖雨旣過居民汎濫遣中書舍人二縣官長賑卹冬十月丁丑詔吳興水淹過度開所在倉賑賜癸巳原建元以前逋租

永明十年以京邑霖雨遣官賑賜 按南齊書武帝本紀十年十一月戊午詔曰頃者霖雨樵糧稍

貴京邑居民多離其弊遣中書舍人二縣官長賑賜

永明十一年詔以水旱申衆逋權斷酒遣中書舍人履行賑卹又詔南兗兗豫司徐五州宿逋更申五年按南齊書武帝本紀十一年五月戊辰詔曰水旱成災穀稼傷弊凡三調衆逋可同申至秋登京師二縣朱方姑熟可權斷酒秋七月丁巳詔曰頃風水爲災二岸居民多離其患加以貧病六疾孤老稚弱彌足矜念遣中書舍人履行沾卹又詔曰水旱爲災實傷農稼江淮之間倉廩旣虛遂草竊充斥互相侵奪依阻山湖成此逋逃曲赦南兗兗豫司徐五州南豫州之歷陽譙臨江廬江四郡三調衆逋宿債並同原除其緣淮及青冀新附僑民復除已訖更申五年

明帝建武二年十二月丁酉詔吳晉陵二郡失稔之鄉蠲三調有差按南齊書明帝本紀云云

東昏侯永元三年六月京邑雨水遣中書舍人二縣官長賑賜有差按南齊書東昏侯本紀云云

梁

武帝天監二年以東陽信安豐安水潦詔蠲課調按梁書武帝本紀天監二年六月丁亥詔以東陽信安豐安三縣水潦漂損居民資業遣使周履量蠲課調

大同四年詔赦饑饉諸州租調 按梁書武帝本紀大同四年八月甲辰詔南兗北徐西徐東徐青冀南北青武仁潼睢等十二州既經饑饉曲赦逋租宿責勿收今年三調

大同十年秋九月己丑詔有因饑逐食離鄉去土悉聽復業蠲課五年 按梁書武帝本紀云云

陳

武帝永定三年詔賑饑民 按陳書武帝本紀永定三年夏閏四月庚寅詔曰開廩賑絕育民之大惠巡方恤患前王之令典朕當斯季俗膺此樂推君德未孚民瘼猶甚重茲多壘彌疚納隍良由四聰弗達千里勿應博施之仁何其或爽殘弊之軌致此未康吳州縉州去歲蝗旱郢田雖疏鄮渠終涸室靡盈積之望家有填壑之嗟百姓不足兆民何賴近已遣中書舍人江德藻銜命東陽與令長二千石問民疾苦仍以入臺倉見米分恤雖德非既飽庶微慰阻饑

文帝天嘉元年詔兵荒之後勸課農桑其逐食流移者悉令著籍 按陳書文帝本紀天嘉元年三月丙辰詔曰自喪亂以來十有餘載編戶凋亡萬不遺一中原氓庶蓋云無幾頃者寇難仍接筭斂繁多且興師以來千金日費府藏虛竭杼軸歲空近所置軍資本充戎備今元惡克殄八表已康兵

戈靜戢息肩方在思俾餘黎陶此寬賦今歲軍糧通減三分之一尙書申下四方稱朕哀矜之意守宰明加勸課務急農桑庶鼓腹含哺復在茲日秋七月乙卯詔曰自頃喪亂編戶播遷言念餘黎良可哀惕其亡鄉失土逐食流移者今年內隨其適樂來歲不問僑舊悉令著籍同土斷之例八月壬午詔曰菽粟之貴重於珠玉自頃寇戎游手者衆民失分地之業士有佩犢之譏朕哀矜黔庶念康弊俗思俾阻饑方存富教麥之爲用要切斯甚今九秋在節萬實可收其班宣遠近並令播種守宰親臨勸課務使及時其有尤貧量給種子

宣帝太建二年詔作田值水旱卽言上折除 按陳書宣帝本紀太建二年秋八月甲申詔曰民惟邦本著在典謨治國愛民抑又通訓朕聽朝晏罷日昃劬勞方流惠澤覃被億兆有梁之季政刑廢缺條綱弛紊僭盜薦興役賦征徭尤爲煩刻大陳御寓拯茲餘弊滅虐戡黎弗遑創改年代彌流將及成俗如弗解張物無與厝夕惕疚懷有同首疾思從卑菲約己濟民雖府帑未充君孰與足便可刪革去其泰甚冀永爲定准令簡而易從自今維作田值水旱未收卽列在所言上折除有能墾起荒田不問頃畝少多依舊蠲稅

太建四年蠲流民繇賦詔凋殘郡邑給地賦田各立頓舍 按陳書宣帝本紀四年秋八月乙未詔無錫等十五縣流民並蠲其繇賦閏十月辛未詔曰姑孰饒曠荆河斯擬博望關畿天限巖峻龍山南指牛渚北臨對熊繹之餘城邇全琮之故壘良疇美柘畦畎相望連宇高雲阡陌如繡自梁末兵災凋殘略盡比雖務優寬猶未克復咫尺封畿宜須殷阜且衆將部下多寄上下軍民雜俗極爲蠹耗自今有罷任之徒許分留部下其已在江外亦令迎還悉住南州津裏安置有無交貨不責市估萊荒墾闢亦停租稅臺遣鎮監一人共刺史津主分明檢押給地賦田各立頓舍

太建六年以南川失稔詔緩田租又遣使賑青齊諸郡 按陳書宣帝本紀六年三月癸亥詔曰去歲南川頗言失稔所督田租於今未卽豫章等六郡太建五年田租可申半至秋豫章又遭太建四年檢首田稅亦申至秋南康一郡嶺下應接民間尤弊太建四年田租未入者可特原除庶修墾無廢歲取方實夏四月辛丑詔曰戢情懷善有國之令圖拯弊救危聖範之通訓近命師薄伐義在濟民青齊舊隸膠光部落久患凶戎爭歸有道棄彼農桑忘其衣食而大軍未接中途止憩胸山黃郭車營布滿扶老攜幼蓬流草跋旣喪其本業咸事遊手饑饉疾疫不免流離可遣大使精加慰撫仍

出陽平倉穀拯其懸磬并充糧種勸課士女隨近耕種石鼈等屯適意修墾

大建十二年以夏中亢旱傷農詔原田稅祿秩 按陳書宣帝本紀十二年十一月己丑詔曰朕君

臨四海日旰勞思弘至治未臻斯道而兵車驟出軍費尤煩芻漕控引不能徵賦夏中亢旱傷農
畿內爲甚民失所資歲取無託此則政刑未理陰陽外度黎元阻饑君孰與足靖言興念余責在躬
宣布惠澤溥沾氓庶其丹陽吳興晉陵建興義興東海信義陳留江陵等十郡并謝署卽年田稅祿
秩並各原半其丁租半申至來歲秋登

北魏

明元帝永興三年以水旱詔簡宮人伎巧悉出以賜鰥民 按魏書明元帝本紀永興三年春二月
戊戌詔曰衣食足知榮辱夫人饑寒切己唯恐朝夕不濟所急者溫飽而已何暇及於仁義之事乎
王教之多違蓋由於此也非夫耕婦織內外相成何以家給人足矣其簡宮人非所當御及執作伎
巧自餘悉出以配鰥民 按食貨志永興中頻有水旱詔簡宮人非所當御及非執作伎巧自餘出
賜鰥民

神瑞二年京師饑詔聽饑民就食山東又出布帛倉穀賑之 按魏書明元帝本紀神瑞二年九月京師民饑聽出山東就食冬十月丙寅詔曰古人有言百姓足則君有餘未有民富而國貧者也頃者以來頻遇霜旱年穀不登百姓饑寒不能自存者甚衆其出布帛倉穀以賑貧窮 按食貨志二年又不熟京畿之內路有行饑帝以饑將遷都於鄴用博士崔浩計乃止於是分簡尤貧者就食山東敕有司勸課留農者曰前志有之人生在勤勤則不匱凡庶民之不畜者祭無牲不耕者祭無盛不樹者死無槨不蠶者衣無帛不績者喪無衰教行三農生殖九穀教行園囿毓長草木教行虞衡山澤作材教行藪牧養蕃鳥獸教行百工飭成器用教行商賈阜通貨賄教行嬪婦化治絲枲教行臣妾事勤力役自是民皆力勤故歲數豐稔畜牧滋息 按崔浩傳浩拜博士祭酒賜爵武城子神瑞二年秋穀不登太史令王亮蘇坦因華陰公主等言讖書國家當治鄴應大樂五十年勸太宗遷都浩與特進周澹言於太宗曰今國家遷都於鄴可救今年之饑非長久之策也東州之人常謂國家居廣漠之地民畜無算號稱牛毛之衆今留守舊都分家南徙恐不滿諸州之地參居郡縣處榛林之間不便水土疾疫死傷情見事露則百姓意沮四方聞之有輕侮之意屈丐蠕蠕必提挈而來

雲中平城則有危殆之慮阻隔恆代千里之險雖欲救援赴之甚難如此則聲實俱損矣今居北方假令山東有變輕騎南出耀威桑梓之中誰知多少百姓見之望塵震服此是國家威制諸夏之長策也至春草生乳酪將出兼有菜果足接來秋若得中熟事則濟矣太宗深然之曰唯此二人與朕意同復使中貴人問浩澹曰今旣餬口無以至來秋來秋或復不熟將如之何浩等對曰可簡窮下之戶諸州就穀若來秋無年願更圖也但不可遷都太宗從之於是分民詣山東三州食出倉穀以粟之來年遂大熟賜浩澹各一人御衣二襲絹五十疋綿五十斤

泰常三年三月庚戌以范陽去年水復其租稅八月鴈門河內大雨水復其租稅 按魏書明元帝本紀云云

泰常八年太武帝卽位詔開倉賑饑 按魏書太武帝本紀泰常八年十月壬申卽皇帝位十有二月開倉庫賑窮乏河南流民相率內屬者甚衆 按冊府元龜八年十月以歲饑詔所在開倉賑

給

太武帝

年南州大水以劉潔奏復天下租賦二歲

按魏書太武帝本紀不載

按劉潔傳

世祖監國潔選侍東宮世祖卽位遷尙書令改爲鉅鹿公時南州大水百姓阻饑潔奏曰臣聞天地至公故萬物咸育帝王無私而黎民戴賴伏惟陛下以神武之姿紹重光之緒恢隆大業育濟羣生威之所振無思不服澤之所洽無遠不懷太平之治於是而在自頃邊寇內侵戎車屢駕天資聖明所在克殄方難旣平皆蒙訓錫勳高者受爵功卑者獲賞寵錫優崇有過古義而郡國之民雖不征討服勤農桑以供軍國實經世之大本府庫之所資自山以東偏遇水害頻年不收就食他所臣聞率土之濱莫非王臣應加哀矜以鴻覆育今南摧彊寇西敗醜虜四海晏如人神協暢若與兆民共饗其福則惠感和氣蒼生悅樂矣世祖從之於是復天下二歲租賦

神麇四年二月丁丑定州民饑詔啟倉以賑之 按魏書太武帝本紀云云

延和三年詔復窮民租 按魏書太武帝本紀延和三年二月戊寅詔曰朕承統之始羣凶縱逸四方未賓所在逆僭蠕蠕陸梁於漠北鐵弗肆虐於三秦是以旰食忘寢抵掌扼腕期在掃清逋殘寧濟萬寓故頻年屢征有事西北運輸之役百姓勤勞廢失農業遭離水旱致使生民貧富不均未得家給人足或有寒窮不能自贍者朕甚愍焉今四方順軌兵革漸寧宜寬徭賦與民休息其令州郡

縣隱括貧富以爲三級其富者租賦如常中者復二年下窮者復三年刺史守宰當務盡平當不得阿容以罔政治明相宣約咸使聞知

太平眞君元年州鎮十五民饑開倉賑恤 按魏書太武帝本紀云云

太平眞君九年二月癸卯山東民饑啟倉賑之 按魏書太武帝本紀云云

文成帝興安元年十有二月癸亥詔以營州蝗開倉賑恤 按魏書文成帝本紀云云

太安三年十有二月以州鎮五蝗民饑使使者開倉以賑之 按魏書文成帝本紀云云

太安五年詔以六鎮雲中高平二雍秦州災旱開倉賑之 按魏書文成帝本紀太安五年冬十有

二月戊申詔曰朕承洪業統御羣有思恢政化以濟兆民故薄賦斂以實其財輕徭役以紓其力欲令百姓修業人不匱乏而六鎮雲中高平二雍秦州徧遇災旱年穀不收其遣開倉廩以賑之有流徙者諭還桑梓欲市糴他界爲關傍郡通其交易之路若典司之官分職不均使上恩不達於下下民不贍於時加以重罪無有攸縱

和平四年冬十月以定相二州雪霜殺稼免民田租 按魏書文成帝本紀云云

和平五年二月詔以州鎮十四去歲蟲水開倉賑恤 按魏書文成帝本紀云云

獻文帝天安元年州鎮十一旱民饑開倉賑恤 按魏書獻文帝本紀云云

皇興二年十有一月以州鎮二十七水旱開倉賑恤 按魏書獻文帝本紀云云

皇興四年春正月詔州鎮十一民饑開倉賑恤 按魏書獻文帝本紀云云

孝文帝延興二年丐遇水民田租開倉賑恤 按魏書孝文帝本紀延興二年六月安州民遇水電

丐租賑恤九月己酉詔以州鎮十一水丐民田租開倉賑恤

延興三年詔出倉穀賜貧民又賑恤水旱諸州 按魏書孝文帝本紀三年三月壬午詔諸倉國穀

麥充積者出賜貧民是歲州鎮十一水旱丐民田租開倉賑恤相州民餓死者二千八百四十五人

延興四年州鎮十三大饑丐民田租開倉賑之 按魏書孝文帝本紀云云

太和元年賑雲中饑詔督課田農又以民饑開倉賑恤 按魏書孝文帝本紀太和元年春正月己

酉雲中饑開倉賑恤三月丙午詔曰朕政治多闕災眚屢興去年生疫死傷大半耕墾之利富有虧

損今東作既興人須肄業其敕在所督課田農有牛者加勤於常歲無牛者倍庸於餘年一夫制治

田四十畝中男二十畝無令人有餘力地有遺利十有二月丁未詔以州郡八水旱蝗民饑開倉賑恤

太和二年州鎮二十餘水旱民饑開倉賑恤 按魏書孝文帝本紀云云

太和三年六月辛未以雍州民饑開倉賑恤 按魏書孝文帝本紀云云

太和四年以膏雨不降詔祀山川羣神又開倉賑民饑 按魏書孝文帝本紀四年二月癸巳詔曰朕承乾緒君臨海內夙興昧旦如履薄冰今東作方興庶類萌動品物資生膏雨不降歲一不登百姓饑乏朕甚懼焉其敕天下祀山川羣神及能興雲雨者修飾祠堂薦以牲璧民有疾苦所在存問是歲詔以州鎮十八水旱民饑開倉賑恤

太和五年以時雨不霑春苗萎悴敕收葬禱神又開倉賑饑 按魏書孝文帝本紀五年夏四月甲寅詔曰時雨不霑春苗萎悴諸有骸骨之處皆敕埋藏勿令露見有神祇之所悉可禱祈十有二月癸巳詔以州鎮十二民饑開倉賑恤

太和六年詔復靈丘租調丐遭水處租賦 按魏書孝文帝本紀六年二月辛卯詔曰靈丘郡土既

編堵又諸州路衝官私所經供費非一往年巡行見其勞瘁可復民租調十五年乙未詔曰蕭道成逆亂江淮戎旗頻舉七州之民既有征運之勞深乖輕徭之義朕甚愍之其復常調三年八月癸未朔分遣大使巡行天下遭水之處丐民租賦貧儉不自存者賜以粟帛十有二月丁亥詔曰朕以寡薄政缺平和不能仰緝緯象蠲茲六沴去秋淫雨洪水爲災百姓嗷然朕用嗟愍故遣使者循方賑恤而牧守不思利民之道期於取辦愛毛反裘甚無謂也今課督未入及將來租算一以丐之有司勉加勸課以要來穰稱朕意焉

太和七年詔給饑民粥又賑州鎮十三民饑 按魏書孝文帝本紀七年三月甲戌以冀定二州民饑詔郡縣爲粥於路以食之又弛關津之禁任其去來六月定州上言爲粥給饑人所活九十四萬七千餘口九月壬寅冀州上言爲粥給饑民所活七十五萬一千七百餘口十有二月庚午開林慮山禁與民共之詔以州鎮十三民饑開倉賑恤

太和八年詔賑民饑 按魏書孝文帝本紀八年十有二月詔以州鎮十五水旱民饑遣使者循行問所疾苦開倉賑恤

太和九年詔以水災賣鬻男女盡還所親 按魏書孝文帝本紀九年八月庚申詔曰數州災水饑
僅薦臻致有賣鬻男女者天之所譴在予一人而百姓無辜橫罹艱毒朕用殷憂夕惕忘食與寢今
自太和六年已來買定冀幽相四州饑民良口者盡還所親雖娉爲妻妾過之非理情不樂者亦離
之

太和十年十有二月乙酉詔以汝南潁川大饑丐民田租開倉賑恤 按魏書孝文帝本紀云云

太和十一年以旱饑詔聽民就豐道給糧粟又詔所在開倉賑恤 按魏書孝文帝本紀十有一年

二月甲子詔以肆州之鴈門及代郡民饑開倉賑恤六月辛巳秦州民饑開倉賑恤癸未詔曰春旱

至今野無青草上天致譴實由匪德百姓無辜將罹饑饉寤寐思求罔知所益公卿內外股肱之臣

謀猷所寄其極言無隱以救民瘼秋七月己丑詔曰今年穀不登聽民出關就食遣使者造籍分遣

去留所在開倉賑恤九月庚戌詔曰去夏以歲旱民饑須遣就食舊籍雜亂難可分簡故依局割民

閭戶造籍欲令去留得實賑貸平均然迺者以來猶有餓死衢路無人收識良由本部不明籍貫未

實廩恤不周以至於此朕猥居民上聞用慨然可重遣精檢勿令遺漏冬十月辛未詔罷起部無益